

貳師將軍伐大宛之後西域震懼多遣使來貢獻漢使

西域者益得職師古曰賞其勤勞皆得拜職也於是自敦煌西至鹽澤

往往起亭而輪臺渠犁皆有田卒數百人置使者校尉

領護師古曰統領保護營田之事也以給使外國者師古曰收其所種五穀以供之至

宣帝時遣衛司馬使護鄯善以西數國及破姑師未盡

殄師古曰雖破其國未能滅之分以為車師前後王及山北六國時

漢獨護南道未能盡并北道也然匈奴不自安矣其後

日逐王畔單于將眾來降護鄯善以西使者鄭吉迎之

既至漢封日逐王為歸德侯吉為安遠侯是歲神爵三

年也乃因使吉并護北道故號曰都護都護之起自吉